

欽定剿平粵匪方略

欽定勦平粵匪方略卷二百二 戊午年

八月十七日

己未

袁甲三奏言

臣馳赴北

全賴調集東省官兵合力撓擊 臣已照會曹亮

各鎮並飛咨山東撫 臣惟往返函商有需時日

應請

旨將山東南路各鎮之兵均由 臣酌量調遣以期迅速

奏入

上命軍機大臣傳諭崇恩曰袁甲三請調山東附近之  
兵合力兜擊著崇恩卽行飭知曹兗各鎮將弁一經  
袁甲三調取卽須迅速赴調不必候本省飭知有需  
時日致誤事機

同日慶端奏言江右逆匪竄陷甯化縣城經前  
代理汀州府知府雷瑞光等督率兵勇分路進  
攻賊衆嬰城死守代理甯化縣知縣劉潤田挑

選壯勇假稱匪黨前往援應賺開南門雷瑞光亦卽督同文武員弁由下東等門攻入殲斃賊匪多名餘逆悉向西門奔竄至石子嶧地方復被伏兵截擊劉潤田亦卽追至刺斃騎馬賊目三名殺賊五百餘名生擒七十八名奪獲旗幟器械無算當將縣城收復該匪分股回竄中河泉上等處臣查閩省上游軍情喫緊甯化雖已

收復而匪徒尙聚歸化甯化所轄地方肆擾邵武府城久爲賊踞本省兵勇連年徵調銳氣漸耗現奉

諭旨飭令潮州鎮總兵壽山將原派兵勇二千名迅速帶赴汀州會同堵剿臣已飛飭該總兵兼程入汀先將歸化甯化一路賊匪搜捕淨盡卽由建甯泰甯等縣進剿直擣邵武會合閩軍四面兜

勦力圖克復奏八

上諭內閣曰福建甯化縣城被賊占踞經官兵分路進  
攻殺賊多名當將縣城收復所有在事出力及被害  
官兵等著慶端查明分別奏請獎卹該匪現竄中河  
等處並著飭令各該地方文武實力防剿毋任延蔓

慶端又奏言江右逆匪竄入閩疆盤踞邵武崇  
安浦城松溪政和各郡縣臣檄調福甯鎮池建

功候補道周揆源等統帶兵勇克復松政二縣  
後飭令搜捕餘匪並督率各軍四面攻擊務期  
克復各城嗣聞浙江敗匪復潛回松溪竄倡政  
和池建功等率兵勇擊退賊復竄陷崇安分股  
竄擾下梅石陂等處臣已添派官兵疾趨松政  
會同兜勦並飛催建陽鎮林向榮等奮力勦擊  
務將邵武崇安浦城各郡縣力圖克復不准遲

聞

誤奏八報

十九日

辛酉

勝保翁同書奏言八月初三日廬州

逆匪數萬由古城集竄至定遠縣屬之界牌地方臣等卽派副都統銜克蒙額等迎勦賊衆向藕塘大路竄撲副都統穆騰阿等分三路兜擊施放連環槍箭該逆敗退官軍追殺二十餘里



斃賊四五百名焚燬賊營七座奪獲驢馬二三十匹旗幟槍礮刀矛不計其數初六日賊匪繞襲池河臣勝保親率馬步各隊進剿賊遂向關山大路奔遁藕塘之賊亦同時潰竄臣當飛飭馬隊追躡賊蹤痛加勦洗至廬州之賊大股東來或有可乘之機臣已選派馬步隊馳往梁園店埠等處探明虛實相機勦辦此次穆騰阿等

奮勇進勦力挫兇鋒實屬著有勞績相應先行  
開列仰懇

天恩准予獎敘以昭鼓勵奏入

上諭內閣曰廬州賊衆數萬由界牌窺伺定遠經官軍  
痛加勦擊賊膽已寒所有尤爲出力之副都統穆騰  
阿著賞加頭品頂戴佐領善慶著賞給濟忒固勒特  
依巴圖魯名號驍騎校花尙阿著賞給額爾奇木圖

巴圖魯名號甲兵得春著賞換花翎其餘出力員弁  
兵丁著准其擇尤酌保

二十一日 癸亥 德興阿奏言九洲之賊勾結金

陵下關賊划欲圖竄逸總兵陳國泰等率隊進  
攻九洲賊壘連毀賊架十數處擊倒望樓一  
座奪獲賊划十餘隻餘划遁回連日疊據各路  
偵探餘賊占踞三界候補道吳棠勇潰賊竄至

來安又李秀城陳玉城各賊全股東犯粵匪勾  
聯衆各數萬來安西北之沙河集珠龍橋相繼  
失守又勝保函稱賊已擾至池河旋報滁州股  
匪東犯來安陳玉城西攻江浦臣正籌防江浦  
而陳逆已於八月十一日由烏衣直撲浦口占  
踞東西葛地方鞠殿華等帶馬步兵勇千餘名  
由小店迎截奮勇衝殺賊勢披靡當將東葛奪

回追賊至西葛賊後股續到分路抄來愈集愈多鞠殿華奮勇殺出撤回小店賊已躡至四面合圍臣飛飭海全等翻山往援臣復親督官軍馳往賊始奔竄仍占東葛十二日鞠殿華海全等分兵前進遙望賊衆數萬徧野彌山我軍奮勇進擊將賊三次壓敗復取東葛正乘勢追至西葛賊營已布滿山谷後路及北山復有埋伏

分股突出賊回身力戰我軍盡入核心賊愈裏  
愈多時博奇馬隊適到內外夾攻鞠殿華手砍  
賊目六名悍賊數十名參將文哲瑋等各帶隊  
殺入賊中左右衝突殲賊甚多 臣親督諸軍鼓  
勇復進賊始全潰 臣查東西葛俱無險可扼將  
全軍撤至小店卽調安勇並由石磧橋撤回官  
兵二千餘名協同固守惟大營四面受敵 臣兵

勇祇一萬五千而全滁和州之賊本有數萬加以廬州梁園新來賊股又有數萬之多其勢萬難抵禦臣不得已飛咨和春等借撥精兵二三千名前來接應

德興阿又奏言八月十二日有另股賊匪竄至江浦後路之新甸廟擄掠經派委防禦永林帶隊追剿殲賊數十名又滁賊分股出撲雷官集

施官集等處富明阿等帶隊出勦賊匪紛紛折  
竄我軍會合追擊屢有斬擒賊乘夜遁回水口  
奏入

上命軍機大臣傳諭德興阿曰皖逆撲及浦營雖經我  
兵以少擊衆而賊勢猖獗亟宜整頓各軍嚴密堵截  
該大臣現調安勇回守小店尙恐兵力不敷和春所  
撥援兵計已渡江賊黨雖多其中裹脅不少如能連



挫兇鋒其勢亦易解散一面督水師認真防勦毋令  
水口之賊窺伺東路

上又命軍機大臣傳諭僧格林沁曰前因山東單縣被  
圍緊急諭令僧格林沁將前次調赴江北官兵截留  
交山東省調遣現在皖逆數萬撲及江浦勢甚危急  
山東單縣業已解圍所有吉林馬隊及直隸提標官  
兵著毋庸截留山東仍著飛咨飭令迅赴德興阿軍

曾以資攻勦

二十三日

乙丑

德興阿奏言皖賊全赴江浦各口

欲通金陵衆逾數萬臣飭安勇等晝夜嚴防並  
派副將銜馬國升等聯絡聲勢合力痛勦賊由  
汭河等處搭板過河博奇等馬步隊分投截擊  
賊大敗潰復經張家渡一帶民團前來助戰聲  
勢愈增追殺一千餘名餘賊淹斃無數和春已

派遊擊馮子材帶兵過江卽派同博奇等聯紮  
數營於安定橋等處另派英貴駐紮陡岡以顧  
浦營北路賊若全潰卽令馮子材移紮大營築  
以顧六合現據富明阿等報六合稍鬆然浦口  
江浦賊已紛撲而來難保不由高塘集再犯東  
路所有六合及施官雷官大營來安文武兵勇  
全責成富明阿溫紹原二員調遣再咨商和春

聞

等添撥精兵二千布置江北以臻嚴密奏入報

二十六日戊辰勝保奏言粵逆自池河敗遁後裏

脅十餘萬賊馬一二千匹竄至滁州因滁城閉  
門不納向東竄去意欲攻撲江浦六合逆首陳  
玉城偏令李世忠分攻來安李世忠進至水口  
地方佯爲攻取稟請大營諭知來安以免驚擾

臣卽飛咨江北軍營早爲防範以免該逆奪路

過江得爲金陵因賊援應臣在定遠部署稍就

卽折回馬頭城大營連日挑選兵勇帶同南下

其餘仍留鳳懷交徐廣縉督率進攻惟逐北追

奔必資馬隊穆騰阿所帶已全赴定遠廬營存

馬已屬不敷鳳懷一帶亦不能不酌留馬隊臣

前請調察哈爾官兵現已飛往迎提並飭李孟

聞

羣收集兵勇於壽州六安一帶扼要駐紮聽候  
調遣廬營潰後頗難振作已嚴飭鎮將大加選  
汰仍待臣親往整頓擬俟鳳懷攻勦事宜部署  
停妥臣卽統帶兵勇馳會撫臣翁同書商定機  
宜迅圖進取奏入報

勝保又奏言正繕摺聞接袁甲三咨稱前調察

哈爾馬隊派員迎提統歸調遣並以北路較南路爲喫緊臣查南路懷遠山川迴複有險可憑張翼二逆盤踞其中悍賊結黨死守加以臨淮鳳陽勢成犄角粵逆自陷廬州乘勢比犯急欲與捻逆勾結臣以孤軍東至池河珠龍橋西抵懷遠馬頭城二百餘里中流橫截兼派馬步兵勇南駐定遠其勢萬分喫緊而袁甲三謂南路

較鬆並有懷遠空虛之說是於南路現辦情形  
全無聞見其北路滄渦兩岸向爲捻匪淵藪張  
落刑被勦窮蹙潛由龍元繞赴西路楚店集等  
處欲約孫葵心各股赴援懷城各捻未肯前來  
張落刑旋即遁歸與龔逆堅壘濬濠意圖死蹏  
並未有入股回竄西路之事現在滋擾西北仍  
是劉狗等零股捻衆是北路賊情較之南路首



惡所聚輕重懸殊 臣深知捻匪實無北犯之志  
且現在首逆與各捻家口屬聚懷城賊黨斷無  
舍捻首棄妻孥而遠竄之理惟大股粵氛亟宜  
力遏北竄今春圍撲固始已駸駸有深入之勢  
若縱令聯爲一氣其患曷可勝言在 臣全局通  
籌用力南賊正爲嚴防北路袁甲三如能向南  
進逼懷城久已合圍奈耽延多日致使東北空

虛任令逆捻肆行出沒查現在軍務以迅克廬  
城顧全江北爲最要臣本擬懷鳳布置停妥統  
旅南征乃因新調馬隊遽被截留遂致師期又  
誤此時南北全局酌量輕重應於此項新調馬  
隊內分撥二百名暫留伊興額軍營協勦其餘  
三百餘名迅赴臣營聽調其暫留之兵應俟蕭  
縣捻匪擊退後仍令南來以厚兵力如此分籌

兼顧庶於北路不致空虛而南路亦無牽掣奏  
八

上命軍機大臣傳諭勝保曰該大臣現擬將懷鳳一帶  
布置停妥卽行督兵南下自爲南北兼顧惟因察哈  
爾馬隊爲袁甲三奏請截留力言捻逆情形南重於  
北猶未免各存意見該大臣旣統全皖軍務應如何  
分撥兵勇不妨徑行派撥卽袁甲三有全數截留之

奏亦可酌度緩急和衷商調况捻匪大股已越徐州而北擾及山東袁甲三所稱北路喫緊亦屬實在情形該大臣既擬將此項馬隊以二百名暫留淮北以三百名調赴南路卽著照所請分撥此外馬步各軍應如何布置總宜與袁甲三商推分別緩急酌量調撥至廬州大股賊匪昨據德興阿奏已陸續東犯其由梁園等處竄撲來安江浦者不下數萬則廬城賊

衆必已空虛勝保亟宜統兵前進掩其不備若能速克廬州亦足牽制南路之賊不使北犯袁甲三未能卽赴臨鳳定遠以北誠不免空虛該大臣現已留兵該處並奏令徐廣縉暫行督率俟徐境賊勢稍鬆袁甲三仍當回顧淮南該大臣布置妥協卽當迅速南征毋再遲延

同日前兵部侍郎曾國藩福建提督楊載福浙

江布政使李續賓奏言臣曾國藩於咸豐三年  
在衡州製造戰船設立水師四年越境勦賊自  
湘潭以至九江焚燒賊艦萬餘其後添置愈多  
均歸臣楊載福與彭玉麟統帶上下三千里舳  
艫不絕肅清江面之局大致纒定惟數年來弁  
勇陣亡不下三千餘人臣楊載福等就湖口石  
鐘山上建祠一所台祀水師陣亡各員弁勇丁

名曰水師昭忠祠上以體

聖主褒揚忠義之意下以動各營觀感奮發之心至前  
提臣塔齊布湘潭一役以千餘新集之師當數  
萬方張之賊楚軍之勇敢實倡於此大局之轉  
機亦始於此其後轉戰岳州武昌大冶興國田  
家鎮廣濟黃梅等處身先士卒所向有功祇以  
九江一郡未能速下忠憤填膺鬱氣成疾日對

孤城竟以身殉本年四月水陸諸軍克復九江  
該處士民及在營弁勇公請建立專祠並附祀  
陸師陣亡各員弁名曰塔忠武公祠現在兩處  
祠宇俱已將次工竣臣等不揣冒昧籲懇

天恩准照昭忠祠之例飭地方官春秋致祭於

聖朝褒忠勸善之道或亦足裨補於萬一

會國藩李續賓又奏言查咸豐三年二月衡山



土匪曹戴李躍搆亂於草市派劉長佑王鑫前往剿滅是爲湘勇殺賊立功之始其後南昌之役謝邦翰易良幹羅信東等同時陣亡臣曾國藩時在衡州倡議於湘鄉建祠祀謝邦翰等及在江殉難之人此後如有死事員弁以次附祀名曰忠義祠數載以來湘勇援鄂援江援廣幾無虛日今者臣等復奉

命援勦閩浙皖豫統計湘勇之出境征伐者不下五六萬人員弁勇丁之陣亡者亦不下五千餘人其間死事最著者羅澤南王鑫劉騰鴻業經奉旨建立專祠亦應推廣

皇仁建祠本縣此外殉難各員如李杏春鍾近衡及營官幫辦哨弁死難之人或慷慨以赴敵或力窮而就義均應彙入總祠以資觀感臣等擬卽倡

捐銀兩就所修之祠添購基地重加修葺凡陣  
亡將領弁勇分別正祀附祀依次列入合無額  
懇

天恩准照各府昭忠祠之例飭地方官春秋致祭奏入  
上諭內閣曰江西湖口石鐘山上建立水師昭忠祠九  
江府城建立塔齊布祠現在將次工竣卽著各該地  
方官照各府昭忠祠之例春秋致祭以褒忠節

上又諭內閣曰湖南省自咸豐二年長沙解圍後經侍郎曾國藩等督率湘勇先後勦賊數年以來死事官紳忠節昭著現該侍郎等於湘鄉地方捐資倡建忠義總祠著准其照各府昭忠祠之例由地方官春秋致祭至已故布政使銜浙江甯紹台道羅澤南贈布政使銜記名道員王鑫補用直隸州知州劉騰鴻前經降旨分別建立專祠著再於本鄉各建一祠以

昭忠蓋

曾國藩又奏言浦城大股賊匪回竄廣豐縣五  
都地方自七月十一至十五等日疊次攻撲縣  
城守備彭大壽會合候選道李元度所派平江  
各營弁兵分路攻擊斃賊百餘名陣斬賊渠二  
人北路圍殺五六十人截斃接應賊匪二十餘  
名南路焚燒賊壘四座斃賊數百名東門外焚

殺賊匪二百餘名生擒九十名餘匪向北逃奔  
是夜官軍出城復破其賊壘五座城圍立解其  
竄至玉山縣城賊匪自十五至二十二等日亦  
經李元度率勇守禦並出城迎擊殲斃無算李  
元度被礮傷暈絕仍復裹創督戰連日賊匪攻  
撲各城並於城外添築賊壘開挖地道悉經官  
軍平毀燒斃挖隧賊匪數十人總兵李定太等

派勇來援我軍乘勢出擊連破賊卡數處該逆  
狂竄德興一帶我軍追殺二百餘名生擒四十  
七名奪獲軍裝旗幟數百件羸馬三十一匹  
解玉山城圍臣查廣玉兩城當浙江福建江西  
三省之衝距安徽之婺源亦不過二百里一有  
疏虞則四省震動此次李元度以一軍力保危  
城厥功尤偉可否籲懇

天恩優加獎敘陣亡把總易金榜李傳綸龔茂發張應  
龍外委龔拱綸八品職銜監生李家純等應請  
旨飭部照各本職從優議卹奏入

上諭內閣曰閩賊竄撲廣豐玉山縣城官軍擊勦屢勝  
先後解圍李元度以一軍分守兩城身受槍傷苦戰  
旬日力保危城厥功甚偉著加恩賞加按察使銜並  
賞給色爾固楞巴圖魯名號其平江各營出力將士



並著曾國藩擇尤保奏陣亡之把總李傳綸龔茂發  
張應龍外委龔拱綸八品職銜監生李家純監生黃  
杳均著各照本職從優議卹

曾國藩又奏言現擾閩境賊匪探係僞易王石  
達開屯踞崇安之星村黎源等處及建邵各屬  
又據擒賊供稱僞國宗楊輔青與石逆共帶賊  
黨十餘萬楊逆先踞浦城石逆自衢處敗竄入

閩窺犯延建等郡本年正月內楊石二逆互相  
讐殺楊逆遂棄浦城出犯廣豐玉山分道而馳  
石逆尙有七八萬衆盤踞閩省各屬總兵周天  
受等已抵浦城臣於八月初八日行抵河口鎮  
張運蘭蕭啟江吳國佐朱品隆等軍均已到齊  
伏查賊渠以石逆爲最悍譖臣卽日親督兵勇  
由鉛山八分水關直擣崇安由崇安而東北可

趨廣豐玉山一路由崇安而南約有三路東出  
延平西至建甯中達汀州現署督臣慶端駐紮  
延平東路當可無虞西路各境有道員劉長佑  
扼隘駐紮賊情萬變其或北歸皖省南返廣東  
老巢目前未能遽測臣俟抵崇安後探確賊蹤  
再行分別進勦奏入報

二十八日

庚午

和春奏言金陵首逆被圍日久探

聞銅井援賊欲由江甯鎮一帶聯絡接應八月

初十日逆黨千餘竄至江甯鎮趕築卡牆參將

章友瑤等分路掩攻斃匪無算突有悍賊大股

由山後竄擁而來官兵更番疊擊總兵李若珠

親督隊伍馳至官兵三面兜勦逆眾大潰轟斃

百餘人餘皆遁歸銅井其南岸援賊如陳玉城

李秀城等均在滁全一帶而皖北自清流三界失事後舒桐廬巢各路匪徒全行下竄將由江浦六合而通江甯八月十一日東西各逆匪四五萬人環撲小店營盤當派總兵馮子材參將馬騰霄各帶兵勇星馳前往臣查金陵爲首逆老巢羣醜護持不遺餘力據報閩省回竄之賊已由德興婺源直至東流建德將越徽池以入

聞  
甯大歸併金陵又聞蕪太賊疊日增揚言日內  
卽犯高滄東壩以解金陵之圍張國樞連日往  
來南北各營督飭嚴防並將新舊濠壘增高挖  
深現在濠牆完固士氣奮揚臣惟有與張國樞  
許乃劄詳酌機宜迅速籌堵勒奏八報

和春又奏言壽春鎮總兵鄭魁士前經奉

諭調赴皖北查現在定遠防務已鬆而蕪太之賊愈集  
愈多且夕謀竄黃池等處又浙閩竄匪麇集饒  
州婺源其前隊已入池州府界甯國防務日形  
緊急鄧紹良力難兼顧其灣沚黃池一帶正當  
賊衝該處防剿不容稍疏惟有仍令該鎮暫時  
在彼會辦以資守禦奏入

上從之

和春又奏言八月二十日瞭見江北浦口一帶  
火光四起據報是日早間官兵攻勦賊營正在  
得手詎逆衆數萬從後抄襲將東路浦口各營  
全行焚燬又准德興阿函稱南北各軍會勦後  
路逆匪欲解小店之圍不料該逆大股數萬已  
踰陡岡由東而抄入浦口城遂致失利德興阿  
扶病親督兵勇衝出重圍現由七里店前赴六



合之謝家店收齊潰軍再圖守禦等因臣查浦  
口大營現已失利賊如盡銳全趨則六合以東  
危急萬分現在德興阿既經退守惟有嚴扼六  
合力保儀揚庶大局尙可收拾至此聞兵勇除  
兩次派援外已無可再分業經飛咨胡興仁酌  
量調回援閩之師徑赴六合防勦本日金陵城  
賊又復出巢肆擾臣已派撥官兵分投堵擊奏

上命軍機大臣傳諭德興阿和春曰金陵圍勦功在垂成逆援踵至堵禦爲難此時浦口一失局勢又恐中變究竟員弁兵勇損失若干德興阿現赴六合能否整頓軍威力圖控扼和春先後派出之官兵五千名已陸續渡江自應合力會勦務使六合以東不致再有疏失方可徐圖恢復著德興阿收集潰兵力籌堵

勦仍飭沿江水師截住洲賊勿使勾連陸路此時賊  
勢猖獗金陵一日不克各路援賊日多和春等早稱  
功在垂成乃蹉跎至此不獨銳氣漸消卽餉糈亦屬  
不繼著和春張國樑激勵將士迅克金陵卽稍有竄  
逸亦不難分路勦辦終勝頓兵城下坐令逆黨生心  
也

上又命軍機大臣傳諭官文曰前因懷遠擒匪回竄北

路袁甲三兵力單薄論令官文將李續賓馬步隊酌量分撥爲南北兼籌之計本日據和春奏金陵援賊勢甚狻猖該處正當圍攻喫緊之時設有疏虞所關匪細著官文酌量情形卽將李續賓分出之兵會同楊載福師船攻勦廬州安慶直達蕪湖等處以牽賊勢都興阿一軍尙在宿松其能否分撥赴援之處並著官文酌量調度

上又命軍機大臣傳諭胡興仁曰江北大股賊匪直撲東路德興阿等迎擊不利浦口失守和春已撥兵五千馳往江北而閩省竄匪復將由甯太以援金陵賊勢披猖兵力不敷於大局殊有關繫現在浙江防務稍鬆所有江南援浙各軍著胡興仁酌量情形卽行飭回令赴六合以資援剿至浙省防務未容稍懈仍著該撫會商李定太等實力堵剿不得稍存玩視

二十九日

辛未

慶端奏言浙江大股敗匪回竄政

和經總兵池建功督率在防文武出城迎勦於  
七月初九至十三等日晝夜鏖戰斃賊甚多賊  
營二十餘里均經我軍追勦燒燬其回攻松溪  
之賊亦於初八至十二等日經兵勇迎擊獲勝  
松溪境內肅清敗匪竄到子孫坑水北等鄉墟  
掠林向榮等馳往截勦小獲勝仗浦城賊匪由

水陸救援各軍被匪衝截且戰且走林向榮等

退守迴龍政和賊匪又分股繞攻水吉浦城逆

匪復又從塔嶺下撲十九日水吉先陷林向榮

退守小湖二十日退守徐墩仔嗣又退守北津

二十二日賊匪竄至建陽代理邵武府知府匡

開益因眾寡不敵退守北津建陽縣城聞已被

賊占踞臣思松政既已廓清自應迅攻浦城力

圖恢復乃林向榮等節節退守奎齡等並不固  
守建陽一任各兵潰退實堪痛恨臣現飭池建  
功等分駐松政扼守以防回竄復派官兵進剿  
水吉以便圖攻浦城第浦城賊匪麕聚急應添  
調勁旅會合圍剿昨據周天受來咨已派張騰  
蛟饒廷選帶領兵勇入閩會剿該鎮親統大兵  
駐紮龍泉進逼浦城等語臣當卽飛咨周天受



由松溪之花橋進攻浦城之前張騰蛟饒廷選  
由江山進攻浦城之後臣仍飛飭林向榮等俟  
恢復水吉卽進紮臨江夕陽嶺一帶會合浙兵  
四面兜圍併力合擊林向榮等應請分別懲處  
慶端又奏言查此股髮匪係自湖北竄入江西  
分竄閩浙今閩省兵勇分投截擊則該逆非同  
竄浙江必仍奔江西此勦彼竄東擊西奔是閩

浙江西三省用兵將無已日臣愚以爲乘此機會  
會亟宜三省合勦四面聚殲臣已咨商周天受  
等合攻浦城又商令周天培駐軍龍泉李定太  
扼守漁梁以防竄浙若河口一帶再有雄兵由  
崇安入關扼勦則可聚而殲旃相應請

旨飭令曾國藩統率所部勁旅馳由河口入閩會同圍

勦奏入

上命軍機大臣傳諭曾國藩曰曾國藩奉命援閩昨已據奏行抵河口擬由鉛山入分水關直搗崇安諒能確探賊蹤相機截擊現在松溪政和縣境肅清其浦城之匪業經周天培等進攻收復城池惟浦崇竄匪現撲建郡情形甚爲猖獗該省兵力不敷若曾國藩所統勁旅由崇安入關扼勦會合閩浙兩省兵勇當可四面聚殲著該侍郎迅速前進督飭張運蘭各軍

掃蕩逆氛毋稍延誤

上諭內閣曰賊匪回竄政和經池建功督兵擊退其回  
攻松溪之賊亦經兵勇迎擊獲勝境內肅清惟浦城  
於克復後竄匪又撲建郡署總兵林向榮等遷延不  
進遇賊退守以致攻陷水吉村都司奎齡等並不固  
守建陽一任各兵潰退實堪痛恨林向榮著革職留  
任奎齡著革職擊問守備劉朝清邱壽昌遊擊戴慶

吳同知顧清濂都司銜許忠標武進士劉金標均著  
革職仍與林向榮等留於軍營效力贖罪

同日耆齡奏言江西官軍自克復瑞臨撫建各  
府城後惟吉安賊匪仍復負隅抗拒七月二十  
一等日曾國荃等水陸各軍四面環攻城內之  
賊屢次出撲並放木簞下衝均經各軍隨時擊  
退八月初十日趙煥聯等會攻北門礮斃騎馬

賊目七名餘匪遁回遮克敦布自水東進攻南街亦多斬獲是夜賊用大箠六架後繫小划數十號乘急流衝下曾國荃遮克敦布等各戰船併力迎擊將賊隊小划小箠在浮橋內擊奪淨盡並擊散大箠一架斃賊無數餘大箠五架衝斷鐵練浮橋下遁定湘等營水陸跟追先後在三曲灘將大箠焚奪無遺登岸之賊概爲陸勇

殲滅計擊斃溺斃之賊數千十一日各營蹋毀  
白鷺洲及城外賊壘多座十五夜卽將吉安府  
城克復江省全境一律蕩平臣已飭派水陸各  
軍追捕逃匪悉數殲除毋留遺孽奏入

上諭曰吉安被陷已久此次耆齡督飭各路兵勇迅速  
奏功辦理尙爲得手竄逃餘匪仍著四面追勦毋令  
再有蔓延出力員弁並著擇尤酌保

同日胡林翼奏言臣於本年七月十一日在任  
丁母憂經督臣官文奏請開缺奉

上諭著照軍營例穿孝百日後仍著署理巡撫如扶柩  
回籍再行賞假兩箇月俟軍務完竣准其補行終制  
以遂孝思欽此臣當擇期扶柩回籍伏念臣終鮮兄  
弟並無子嗣喪葬之事別無可託之人查丁憂  
起復名教攸關卽墨經從戎亦屬萬不得已楚



皇朝通志卷之三十三  
三十三  
境現已肅清督臣官文實能主持全局湖北治理原不繫臣之去留且臣職任封圻當司風化今於衰經之中起復視事心實不安惟有懇

恩俯准臣在本籍終制一俟服闋卽當泥首

宮門力圖報效奏入

上諭內閣曰現在楚境雖已肅清而逆氛未靖大軍水陸東下儲備糧餉以及地方善後邊防各事宜均關

緊要胡林翼熟悉情形實心任事當此時事多艱正  
臣子力圖報效之日未可拘泥恆情致誤事機胡林  
翼著仍遵前旨於假滿後署理湖北巡撫印務俟軍  
務完竣准其補行終制以遂孝思

同日江甯布政使楊能格奏言皖匪自陷廬州  
後由梁園店埠竄入大柳池河一帶勾結捻匪  
併滁全之賊勢已逾萬分股攻撲浦口六合圖

援金陵九洲賊又乘勢來撲以致浦營有失  
浦口之糧臺行營糧米軍火器械亦俱失陷委  
員等不知下落現在德興阿等聚兵駐守六合  
以遏賊氛查自浦口至揚州道路紛歧防不勝  
防賊若乘勢分股豕突旦夕可到在城兵勇僅  
有數百何能支持行營糧臺已失所恃惟本臺  
尚有積存之餉款軍械萬一再有疏虞何從措

手臣惟有督飭委員將銀錢軍火等項搬運上船相機保護並知會淮揚道郭沛霖等督率在城官弁嚴行防守奏入

上諭曰觀汝此時必以護餉爲詞出城登舟何膽怯若是大員尙如此慌張無怪乎居民紛徙保護軍械糧餉豈無委員可派六合後路汝應幫同駐守將官協力防堵毋得稍存膜視

三十日壬申德興阿奏言浦營四面俱是賊巢狂

寇約近數萬浦南九湫洲之賊因逆援大至合

夥出撲臣久因核心因向和春借撥兵勇五千

名過江防勦八月二十日臣派兵勇先解小店

之圍先聞馮子材等已將賊壓下俄報馬步兵

勇俱敗紛紛過山賊窮追緊躡衝破陡岡軍營

直抄浦口臣因偕鞠殿華拌死迎勦賊已陷浦

口城直撲臣壘臣等揮軍四面迎截槍礮連環  
賊斃甚多無如賊匪太衆力戰不退另股並抄  
江浦西路九洲之賊又浮水來撲臣與鞠殿  
華諸將殺出重圍暫駐通江集招聚潰兵飛囑  
和春速爲奏請就近撥兵以顧江北大局臣一  
面派總兵陳國泰周希濂率各戰船防大江中  
路陳世忠防寶塔根觀音門等處黃斌李新明

仍防上游臣調度無方萬死莫贖惟請

皇上將臣從重治罪臣現在沿途招集潰兵布置水師  
謹防賊竄瓜儀查陸路六合尤爲喫重聞賊已  
由葛塘集東竄業已飛飭成明富明阿海全等  
分帶兵勇會同溫紹原嚴加防範

同日翰殿華奏言查江北大局以扼六合防淮  
揚爲最要關鍵德興阿偕臣連夜進兵惟德興

阿六載行軍久成手足疼痛胸腹煩悶之證今  
歲各病日增又值浦口失事愁急交攻徹夜呻  
吟現雖赴六合防剿精力實已不支查三軍進  
止全資主帥刻下督防六合萬分喫緊臣祇得  
商諸將領除緊急軍務稟商外其餘防剿諸小  
節臣等相機妥辦現在潰兵漸集德興阿已派  
趙樹棠帶領一千名馳往六合又據和春來咨



添兵過江赴六合協勦是江北軍威復振臣殺賊不力負罪至重惟有調護主帥激勵將士努力堵勦或冀稍贖前愆於萬一均奏入

上命軍機大臣傳諭德興阿翰殿華曰浦口旣已失利悍賊全趨北岸六合以東萬分危急速宜收拾潰兵先扼六合力保儀揚再圖攻復浦口城池支撐大局馮子材等赴援之軍皆屬精銳和春又添兵二千名

過江協勦著德興阿等妥爲調度復振軍聲此時德興阿病勢頗重深恐精力不支著鞠殿華善爲保護並著與德興阿商酌在該營鎮將中擇其謀勇兼長堪勝幫辦者奏保一員候旨簡派至江浦孤城是否尙能固守浦口潰散各員下落傷亡弁兵若干著一併查明具奏

上諭內閣曰賊匪攻撲漢河集等處並九洲賊合夥

山巢勢甚猖獗浦口營壘被陷德興阿統師兩載有餘從無挫失鞠殿華亦素稱奮勇此次浦口潰敗雖因賊衆兵單究屬督率無方德興阿著拔去雙眼花翎革職留任鞠殿華著革職留任仍著該大臣等激勵將士會同江南援軍迅將浦口克復以贖前愆

同日翁同書奏言廬和賊匪竄至池河後由清流關竄撲江浦小店鞠殿華力戰擊退該逆裹

脅數萬占踞東葛西葛等處連營數十里意圖  
接應金陵臣思賊蹤來去靡常若爲浦口官軍  
擊敗勢必回撲定遠現在賊匪尙踞東西葛等  
處萬一向原路回竄則關山珠籠橋首當其衝  
大柳池河卽其後路臣已添派兵勇分路防範  
定遠城外臣親督余成蛟等逐日操演南路張  
橋蔣家巷一帶駐紮兵勇亦令步步爲營相機

進剿

同日耆齡奏言江西玉山敗賊由德興竄至景德鎮道員劉于瀆迎剿失利退守凰岡坵添調兵勇再行進剿又福建光澤縣逆匪由鐵牛關瀘溪竄至金谿經各團練進剿逆眾敗退瀘溪分股竄往饒州府屬安仁縣之山背地方被水師礮斃多名臣查兩路竄賊均聚饒州屬境亟

聞

應迅速撲滅臣已札調各路兵勇馳赴瀘溪金  
谿堵剿並飛咨李定太速飭參將文瑞等剋日  
回江先剿安仁竄匪再行會攻景德鎮次第掃  
蕩均奏入報